

**VISOKOŠKOLSKA USTANOVA  
VISOKA ŠKOLA ZA FINANSIJE I RAČUNOVODSTVO  
FINra TUZLA**

**PRAVILNIK O ZAŠTITI OD POŽARA**

**Tuzla, 2016. godine**

U skladu sa članom 24. Zakona o zaštiti od požara i vatrogastvu (Službene novine Federacije Bosne i Hercegovine, br. 64/09), članom 55. Zakona o radu (Službene novine Federacije Bosne i Hercegovine broj. 26/16) i članom 26. Statuta, Upravni odbor Visoke škole za finansije i računovodstvo FINra Tuzla, na drugoj sjednici održanoj 29.10.2016. godine, donosi:

## **P R A V I L N I K O Z A Š T I T I O D P O Ž A R A**

### **I OPŠTE ODREDBE**

#### **Član 1.**

Pravilnikom o zaštiti od požara (u daljem tekstu: Pravilnik) utvrđuje se način sprovođenja i unapređenja mjera iz oblasti zaštite od požara na Visokoj školi za finansije i računovodstvo FINra Tuzla (u daljem tekstu Visoka škola).

#### **Član 2.**

Zaštita od požara obuhvata skup mjera i radnji organizacione, tehničke i propagandne prirode, koje se poduzimaju u cilju sprječavanja izbijanja i širenja požara, otkrivanja i gašenja požara, te spašavanja ljudi i materijalnih dobara ugroženih požarom.

#### **Član 3.**

Zaštita od požara organizuje se i kontinuirano sprovodi na svim radnim mjestima i svim objektima gdje postoji mogućnost izbijanja i širenja požara. Mjere zaštite od požara preduzimaju se radi otklanjanja uzroka požara, sprječavanja izbijanja i širenja požara, te za otkrivanje i gašenja požara.

#### **Član 4.**

Zaštita od požara na Visokoj školi je sastavni dio redovnog poslovanja, rada i zaštite radnika i imovine, a sprovodi se u okviru redovnih radnih zadataka na svakom radnom mjestu.

#### **Član 5.**

Ovim Pravilnikom utvrđuje se sljedeće:

- mjere zaštite od požara koje se moraju sprovesti na Visokoj školi i obaveze radnika u pogledu kontrole i sprovođenja propisa iz oblasti zaštite od požara i radnih uputstava,
- organizacija poslova zaštite od požara na Visokoj školi, djelokrug i ovlaštenja lica zaduženog za poslove zaštite od požara, te njegovu školsku ili stručnu spremu,
- način vršenja unutrašnje kontrole sprovođenja mjera zaštite od požara, te dužnosti, odgovornosti i ovlaštenja radnika koji tu kontrolu neposredno vrše,

- postupak i način upoznavanja radnika prilikom stupanja na rad ili rasporeda sa jednih poslova i radnih zadataka na druge, sa opasnostima od požara na tom radnom mjestu, kao i način obuke radnika iz oblasti zaštite od požara i rukovanja opremom i sredstvima za gašenje požara, odnosno upoznavanje radnika sa mjerama zaštite od požara,
- vrsta i količina opreme i sredstva za gašenje požara na Visokoj školi, raspored opreme i sredstava, kao i vrijeme povremenog ispitivanja njihove ispravnosti,
- zadatke Direktora, rukovodećih radnika, te radnika koji imaju posebna ovlaštenja i odgovornosti u pogledu sprovođenja zaštite od požara, i
- odgovornost radnika zbog nepridržavanja propisanih mjera ili naređenih mjera iz oblasti zaštite od požara, dužnosti i ponašanje radnika u slučaju izbijanja požara i slično.

#### **Član 6.**

Visoka škola je dužna da na najbolji mogući način organizuje poslove zaštite od požara, te da obezbjeđuje materijalno-tehnička sredstva i opremu za zaštitu od požara i gašenje požara, te da organizuje njihovo održavanje, kontrolu i ispitivanje.

#### **Član 7.**

Radnici na Visokoj školi dužni su da učestvuju u gašenju nastalih požara i spašavanju ljudi i materijalnih dobara ugroženih požarom.

#### **Član 8.**

Visoka škola kao podzakupac izgrađenog objekta, tehničko-tehnoloških procesa ili njihovih adaptacija i rekonstrukcija, dužna je da primjenjuje propisane mjere i normative iz oblasti zaštite od požara.

#### **Član 9.**

Rukovodeći radnici, radnici sa posebnim ovlaštenjima i odgovornostima, kao i svi drugi radnici na Visokoj školi, dužni su da u sprovođenju mjera iz oblasti zaštite od požara postupaju u skladu sa odredbama pozitivno-pravnih propisa koji regulišu ovu materiju, odredbama ovog Pravilnika, kao i svim drugim važećim aktima iz ove oblasti.

#### **Član 10.**

Sprovođenje mjera zaštite od požara je obaveza svakog radnika Visoke škole u djelokrugu njegovog radnog mjesta.

#### **Član 11.**

Odredbe ovog Pravilnika odnose se, pored radnika koji su u stalnom radnom odnosu na Visokoj školi i na sva ostala lica koja se po bilo kom osnovu nalaze radno angažovana na Visokoj školi.

## **II – MJERE ZAŠTITE OD POŽARA**

### **Član 12.**

Mjere zaštite od požara mogu biti: tehničke, upravne, organizacione, obrazovne i druge prirode kojima se sprječava izbijanje i širenje požara.

### **Član 13.**

Tehničke mjere obuhvataju, prije svega, tehničke normative i standarde koji su doneseni na osnovu odredaba pozitivno-pravnih propisa koji regulišu ovu materiju.

Upravne mjere uglavnom su propisane zakonskim odredbama, a njihovo sprovođenje uređeno je i propisano odredbama ovog Pravilnika, te drugim pozitivno-pravnim propisima koji regulišu ovu materiju.

Organizacione mjere su predmet zakonske regulative i odnose se na pitanja odgovornosti za organizovanje i sprovođenje zaštite od požara.

### **Član 14.**

U cilju sprječavanja izbijanja i širenja požara, Visoka škola preduzima mjere zaštite od požara, a naročito:

1. Na mjestima gdje se obavljaju poslovi i radni zadaci pri kojima postoji opasnost od izbijanja požara, moraju se postaviti posebna sredstva i oprema za prvu intervenciju u slučaju izbijanja požara (ručni aparati za gašenje početnih požara i slično).
2. Na mjestima gdje postoji povećana opasnost od pojave požara, sprovode se posebne mjere zaštite u zavisnosti od materijala kojima se rukuje.
3. U svim prostorijama gdje se odvija proces rada moraju biti postavljeni ručni aparati za gašenje početnih požara ili izvedeni zidni hidranti, ako je to predviđeno projektnom dokumentacijom, a električne instalacije moraju biti izvedene u skladu sa tehničkim propisima.
4. Kontrola ispravnosti aparata za početno gašenje požara mora se vršiti u ovlaštenoj organizaciji, društvu ili ustanovi, a prema važećim pozitivno-pravnim propisima i uputstvima proizvođača.
5. Ručni aparati za gašenje početnih požara kao i druga sredstva za gašenje požara moraju biti postavljena na vidna i lako pristupačna mjesta.
6. Na stepeništima, hodnicima i prostoru određenom za odvijanje transporta i kretanja radnika, ne smiju se držati nikakvi predmeti ili materijali, a posebno ne opasne i lako zapaljive materije.

7. Razvodni ormar u kojem su smještene električne instalacije mora biti zaključan i zabranjeno je u istom držati strane predmete.

#### **Član 15.**

Izgradnja, adaptacija i dogradnja objekata Visoke škole može se vršiti samo uz odobrenje vlasnika objekta, uz uslov da se tim ne stvara opasnost od požara za sam objekat i druge objekte koji se nalaze u blizini.

#### **Član 16.**

Iz radnih prostorija Visoke škole mora biti omogućena bezbjedna evakuacija radnika u slučaju izbijanja požara, a putevi za evakuaciju moraju biti vidljivo označeni, stalno slobodni i prohodni.

#### **Član 17.**

Električne instalacije, ventilacioni kanali, toplovodne instalacije, gromobranske instalacije i dimovodni kanali koji se koriste za potrebe Visoke škole moraju se postaviti, odnosno izvoditi, koristiti i održavati prema propisanim tehničkim normativima i standardima, kao i uputstvima proizvođača.

#### **Član 18.**

Električne instalacije u objektima Visoke škole moraju biti izvedene u skladu sa tehničkim propisima, tako da ne predstavljaju opasnost za izbijanje požara.

#### **Član 19.**

Na glavnom razvodnom ormaru električnih instalacija u objektima Visoke škole mora biti ugrađena glavna sklopka za dovođenje cijelog objekta u beznaponsko stanje. Sklopka mora biti obilježena natpisom «**GLAVNA SKLOPKA**».

#### **Član 20.**

Održavanje električnih instalacija i uređaja, te uređaja na električni pogon, mogu vršiti samo ovlaštene radnici Visoke škole i lica koja su za te poslove stručna i ovlaštena. Na električnim instalacijama ne smiju se izvoditi bilo kakve improvizacije.

#### **Član 21.**

Pri vršenju bilo kakve opravke na električnim instalacijama i uređajima na Visokoj školi, isti moraju biti isključeni iz strujnog kruga.

#### **Član 22.**

Pregledi i ispitivanja električnih instalacija bitnih sa stanovišta zaštite od izbijanja požara na Visokoj školi (ispitivanje otpornosti izolacije, preopterećenja instalacije i slično),

moraju se vršiti u skladu sa tehničkim propisima i to najmanje jednom u godini dana. Pregledi i ispitivanja iz stava 1. ovog člana moraju se vršiti i nakon svake intervencije ili prepravke električne instalacije, te kada se posumnja u njenu ispravnost, kao i nakon većih havarija i oštećenja.

#### **Član 23.**

Ukoliko se na Visokoj školi pri opravci sredstava rada, instalacija i druge opreme vrše varilački radovi i radovi na rezanju metala, obavezno se moraju primjeniti dodatne mjere zaštite (obezbjedenje dodatnih aparata za početno gašenje požara, kanti sa vodom, posuda sa pijeskom i slično).

#### **Član 24.**

Prije početka izvođenja zavarivačkih radova i radova na brušenju i rezanju metala, moraju se iz neposredne blizine radova odstraniti svi zapaljivi materijali (piljevina, drvene ploče, iverica, kante sa gorivom, mazivom, krpe, papir i slično).

### **III – ORGANIZACIJA I NAČIN UNUTRAŠNJE KONTROLE, OVLAŠTENJA I ODGOVORNOSTI RADNIKA KOJI VRŠE KONTROLU**

#### **Član 25.**

Poslovi zaštite od požara na Visokoj školi su organizovani na nivou referata i obavlja ga lice zaduženo od strane Direktora, a prema odredbama Pravilnika o organizaciji i sistematizaciji poslova, radnih zadataka i radnih mjesta na Visokoj školi.

#### **Član 26.**

Sprovođenje mjera iz oblasti zaštite od požara je obaveza svakog radnika na Visokoj školi, a u djelokrugu njegovog radnog mjesta.

#### **Član 27.**

Direktor imenuje Osobu odgovornu za poslove zaštite od požara na Visokoj školi, i ta osoba obavlja sljedeće poslove:

- prati stanje iz oblasti zaštite od požara,
- učestvuje u izradi općih akata iz oblasti zaštite od požara,
- angažuje za potrebe Visoke škole stručne saradnike iz oblasti zaštite od požara,
- vodi propisane evidencije i čuva dokumentaciju i isprave iz oblasti zaštite od požara,
- učestvuje u izradi Programa mjera zaštite od požara,
- organizuje obuku i provjeru znanja radnika iz oblasti zaštite od požara,
- vrši neposrednu kontrolu sprovođenja mjera zaštite od požara na Visokoj školi utvrđenih odredbama ovog Pravilnika i odredbama pozitivno-pravnih propisa koji regulišu ovu oblast,

- preventivno djeluje i vrši evidentiranje mogućih izvora opasnosti od izbijanja požara i određuje mjere zaštite,
- vrši raspored sredstava i opreme za gašenje požara,
- kontroliše da li se u određenim rokovima vrši servisiranje i ispitivanje ručnih vatrogasnih aparata i hidranata,
- kontroliše da li se u određenim rokovima vrši ispitivanje električne instalacije, uređaja, gromobranskih instalacija i slično,
- privremeno obustavlja rad na radnim mjestima gdje ustanovi opasnosti i nedostatke koji bi mogli izazvati požar,
- privremeno odstranjuje sa radnog mjesta radnike koji svojim radom krše i ne sprovode mjere iz oblasti zaštite od požara,
- angažuje po potrebi stručna lica i ustanove za obavljanje poslova iz oblasti zaštite od požara, i
- obavlja i druge poslove predviđene odredbama pozitivno-pravnih propisa koji regulišu ovu materiju.

#### **Član 28.**

Radnik zadužen za poslove zaštite od požara mora imati najmanje srednju školsku ili stručnu spremu tehničke grupacije, potrebno radno iskustvo, te mora biti posebno stručno osposobljen za uspješno vršenje poslova iz oblasti zaštite od požara.

### **IV– PRAVA, OBAVEZE I ODGOVORNOSTI RUKOVODEĆIH RADNIKA**

#### **Član 29.**

Svi rukovodeći radnici, svaki u djelokrugu svoga radnog mjesta, imaju posebna prava, obaveze i odgovornosti u sprovođenju mjera iz oblasti zaštite od požara.

#### **1. Direktor Visoke škole**

#### **Član 30.**

Direktor Visoke škole kao najodgovornija osoba za organizaciju i sprovođenje mjera iz oblasti zaštite od požara, obavlja sljedeće poslove:

- Sprovodi opći akt kojim reguliše oblast zaštite od požara,
- organizuje poslove na Visokoj školi tako da se odredbe pozitivno-pravnih propisa i drugih općih akata iz oblasti zaštite od požara pravilno i potpuno primjenjuju,
- donosi i usvaja Program mjera zaštite od požara,
- stara se o obezbjeđenju radnih mjesta, gdje prijete opasnosti od izbijanja požara,
- razmatra stanje zaštite od požara na Visokoj školi najmanje jedanput godišnje,
- obezbjeđuje potrebna sredstva za sprovođenje mjera iz oblasti zaštite od požara, te vrši nabavku sredstava i opreme za gašenje požara,
- nadgleda i kontroliše rad ostalih radnika po pitanju sprovođenja mjera iz oblasti zaštite od požara,

- angažuje, za potrebe Visoke škole, stručne saradnike iz oblasti zaštite od požara, i
- obavlja i druge poslove u skladu sa odredbama pozitivno-pravnih propisa, a koje su neophodne za bezbjednost objekata i lica po pitanju zaštite od požara.

## **2. Rukovodeći radnici**

### **Član 31.**

Rukovodeći radnici vrše sljedeće poslove:

- organizuju periodične preglede električnih instalacija, uređaja, gromobranskih instalacija i slično, a po pitanju primjene mjera iz oblasti zaštite od požara.
- brinu o pravilnom uskladištenju robe, proizvoda i zapaljivih materijala, te o stalnoj prohodnosti prolaza i prilaza u prostorijama objekta, - brinu o tehničkoj ispravnosti sredstava rada, opreme i uređaja, - vrše vizuelnu kontrolu i ispravnost električnih instalacija i uređaja,
- brinu o ispravnosti opreme i sredstava za gašenje požara (vatrogasni aparati i hidranti),
- predlažu Direktor Visoke škole preduzimanje odgovarajućih mjera vezanih za poboljšanje stanja iz oblasti zaštite od požara,
- predlažu Direktor Visoke škole otklanjanje određenih nedostataka u objektima i na sredstvima rada koji prijete izbijanju požara,
- zabranjuju pušenje u radnim prostorijama i prostorima gdje prijete opasnost od izbijanja požara,
- kontrolišu rad radnika po pitanju sprovođenja propisa, uputstava i mjera iz oblasti zaštite od požara,
- daju stručna uputstva radnicima kod obavljanja poslova gdje postoji povećana opasnost od izbijanja požara,
- privremeno odstranjuju radnika sa radnog mjesta koji svojim radom krši propise iz oblasti zaštite od požara,
- upoznaju radnika sa mjestima gdje se nalaze ručni vatrogasni aparati i druga sredstva za gašenje požara, i
- obavljaju i druge poslove u skladu sa odredbama pozitivno-pravnih propisa i odredaba ovog Pravilnika, a po naređenju Direktora.



## **V – PRAVA, OBAVEZE I ODGOVORNOSTI RADNIKA**

### **Član 32.**

Svaki radnik u radnom odnosu na Visokoj školi, ili lice koje je po bilo kome osnovu radno angažovano na Visokoj školi, kao i učenici i studenti koji obavljaju praksu na Visokoj školi, imaju pravo i obavezu:

- da se prilikom stupanja na rad, odnosno raspoređivanja na poslove i radne zadatke, upoznaju sa odredbama ovog Pravilnika, izvorima opasnosti i mjerama iz oblasti zaštite od požara na radnom mjestu na koje su raspoređeni,
- da budu upoznati sa mjestima gdje se nalazi najbliža oprema i sredstva za gašenje požara i sa načinom rukovanja tom opremom,
- da opremu i sredstva za gašenje požara čuvaju od oštećenja,
- da odmah čim primjete izbijanje požara pristupe njegovom gašenju sa svim raspoloživim sredstvima, ukoliko ocijene da požar mogu ugasiti bez opasnosti po sopstveni život ili zdravlje,
- da svojim radom na radnom mjestu ne uzrokuju požar, i
- da odmah obavijeste neposrednog nadređenog radnika o uočenim nedostacima i nepravilnostima na sredstvima rada, opremi, instalacijama i sredstvima za gašenje požara.

Radnik je naročito odgovoran ako:

- namjerno ili nepažnjom izazove požar,
- ostavlja zapaljive materije na mjestu koja za to nisu određena,
- bez opravdanog razloga odbije da učestvuje u gašenju požara,
- neodgovorno se odnosi prema opremi i sredstvima za gašenje požara, ili ih koristi u nedozvoljene svrhe,
- neopravdano ili bez ikakve potrebe daje znak za izbijanje požara,
- ne sprovodi propisane mjere iz oblasti zaštite od požara i poslove obavlja mimo uputstava i tehničkih propisa, i
- upotrebljava otvoreni plamen ili puši u prostorijama gdje je to zabranjeno.

## **VI-NAČIN UPOZNAVANJA RADNIKA SA OPASNOSTIMA OD POŽARA**

### **Član 33.**

Svaki radnik u stalnom radnom odnosu na Visokoj školi, ili lice koje je po bilo kom osnovu radno angažovano na Visokoj školi, kao i učenici i studenti koji obavljaju praksu na Visokoj školi, moraju biti obučeni za gašenje požara i rukovanje ručnim vatrogasnim aparatima za gašenje početnih požara.

#### **Član 34.**

Provođenje obuke i provjera znanja radnika iz oblasti zaštite od požara iz člana 37. ovog Pravilnika vrši se u skladu sa odredbama pozitivno-pravnih propisa koji regulišu ovu materiju, odredbama ovog Pravilnika i odredbama Programa obrazovanja i provjera znanja radnika iz oblasti zaštite od požara.

#### **Član 35.**

Program obrazovanja i provjera znanja radnika iz oblasti zaštite od požara mora naročito sadržavati:

- organizaciju zaštite od požara,
- opasnosti i izvore izbijanja požara,
- mjere zaštite od požara, te način rukovanja i održavanja ručnih aparata za gašenje početnih požara, i
- odgovornosti, prava i obaveze radnika iz oblasti zaštite od požara.

#### **Član 36.**

Visoka škola je dužna da najmanje jednom u toku jedne godine izvrši provjeru znanja svih radnika iz oblasti zaštite od požara.

#### **Član 37.**

Obuku i provjeru znanja radnika iz oblasti zaštite od požara na Visokoj školi mogu vršiti stručna lica sa najmanje visokom ili višom školskom ili stručnom spremom vezanom za oblast zaštite ili druge tehničke struke, ako rade na poslovima zaštite od požara.

#### **Član 38.**

O izvršenoj obuci i provjeri znanja radnika iz oblasti zaštite od požara, odgovorno lice na Visokoj školi dužno je voditi evidenciju.

### **VII – VRSTA I KOLIČINA SREDSTAVA I OPREME ZA GAŠENJE POŽARA**

#### **Član 39.**

Na Visokoj školi na određenim mjestima moraju biti postavljeni i jasno vidljivi, te lako pristupačni ručni aparati za gašenje početnih požara.

U objektima Visoke škole upotrebljavaju se aparati tipa «S» (suhi prah) ili «CO<sub>2</sub>» (ugljen dioksid), odnosno drugi aparati prema namjeni objekta.

#### **Član 40.**

Nakon svake upotrebe vatrogasnog aparata, Visoka škola je dužna odmah isti poslati na punjenje i kontrolu u ovlaštenu ustanovu, a svi radnici koji su upotrijebili vatrogasni aparat dužni su o tome obavijestiti neposredno nadređenog radnika ili odgovorno lice za zaštitu od požara.

## VIII PLAN ZAŠTITE OD POŽARA I NJEGOVO PROVOĐENJE

### Član 41.

U cilju ostvarivanja razvoja i unapređivanja zaštite od požara na Visokoj školi donosi se Plan zaštite od požara. Plan zaštite od požara donosi se na osnovu odluke nadležnog općinskog organa i mora biti u skladu sa općinskim Planom zaštite od požara, ukoliko isti postoji.

### Član 42.

Plan zaštite od požara obuhvata naročito:

- a) analizu i procjenu ugroženosti od požara;
- b) organizaciju zaštite od požara;
- c) sistem obavještanja i davanja uzbune;
- d) postupak u slučaju požara;
- e) tehničku opremu i sredstva za gašenje požara;
- f) način snabdijevanja vodom;
- g) puteve prolaze i prilaze;
- h) lokaciju i klasifikaciju objekta prema namjeni i prema stepenu opasnosti od požara;
- i) zaštitne zone i mogućnosti prenošenja požara.

### Član 43.

Planom od požara utvrđuju se ciljevi i zadaci u pogledu organizovanja i poduzimanja mjera zaštite od požara, kojima se obezbjeđuje sigurnost imovine, radnika i posjetilaca na Visokoj školi.

Planom zaštite od požara preventivno se utvrđuju izvori opasnosti od izbijanja požara u pojedinim objektima i na Visokoj školi kao cjelini i sagledavanje mogućnosti zaštite od požara.

### Član 44.

Sve promjene i dopune plana zaštite od požara unose se redovno kada su donijeti, a najmanje na kraju godine.

### Član 45.

Plan zaštite od požara donosi se u skladu sa Planom zaštite od požara koji donosi nadležni općinski organ i na osnovu ocjene stanja zaštite od požara na Visokoj školi. Programom mjera zaštite od požara donosi se za svaku godinu i to najkasnije do kraja tekuće godine za narednu godinu.

#### **Član 46.**

Planom zaštite od požara utvrđuju se obaveze i zadaci koji se trebaju izvršiti u periodu za koji se program donosi, rokovi i način izvršenja obaveza i zadataka. Takođe se utvrđuju organi, odnosno radnici na Visokoj školi koji su odgovorni za njegovo provođenje.

Pored obaveza i zadataka iz stava 1. ovog člana, Plan zaštite od požara sadrži mjere koje se odnose naročito na:

- a) kontrolu ispravnosti aparata i opreme za gašenje požara;
- b) kontrola stanja u objektima/prostorijama sa stanovišta zaštite od požara, elektro instalacije, gromobranske instalacije, instalacije, grijanja i sl;
- c) kontrolu održavanja stalnih prolaza, prilaza, uzlaza i izlaza i sl;
- d) kontrola uskladištene robe po vrstama i količini, a posebno kontroli zapaljive robe, lako zapaljivih tekućina i plina;
- e) kontrolu otklanjanja ranije utvrđenih nedostataka u radnim i pomoćnim prostorijama i drugim mjestima na kojima radnici rade ili se kreću.

### **IX UNUTRAŠNJA KONTROLA PROVOĐENJA PREDVIĐENIH MJERA ZAŠTITE OD POŽARA**

#### **Član 47.**

Vršenje unutrašnje kontrole i staranje o sprovođenju mjera zaštite od požara obavlja osoba odgovorna za poslove zaštite od požara.

#### **Član 48.**

Osoba odgovorna za poslove zaštite od požara i zadužena za poslove unutrašnje kontrole provođenja predviđenih mjera zaštite od požara, nakon svakog izvršenog pregleda primjena mjera zaštite od požara, podnosi izvještaj Direktor u Visoke škole o uočenim nedostacima.

#### **Član 49.**

Osoba odgovorna za poslove zaštite od požara ovlaštena je, da uz saglasnost sa Direktora izvrši otklanjanje svih nedostataka iz oblasti zaštite od požara..

### **X – DUŽNOSTI RADNIKA U SLUČAJU IZBIJANJA POŽARA I NJIHOVO PONAŠANJE**

#### **Član 50.**

Svaki radnik koji primjeti neposrednu opasnost od izbijanja požara ili primjeti požar dužan je ukloniti opasnost, odnosno ugasiti požar, ako to može učiniti bez opasnosti za sebe ili druge radnike.

Ako radnik ne može sam ugasiti požar, dužan je odmah obavijestiti vatrogasnu jedinicu, te pozvati u pomoć ostale radnike da svim raspoloživim sredstvima i opremom za gašenje

požara pokušaju ugasiti požar ili spriječiti njegovo daljnje širenje, odnosno da ga lokalizuju.

Radnici koji su primjetili požar ili su bili na to upozoreni, dužni su da iz neposredne blizine pakupe sve raspoložive količine vatrogasnih aparata i drugih sredstava, te da ih odnesu na mjesto požara radi gašenja požara.

#### **Član 51.**

Prilikom pojave požara na Visokoj školi, najhitnije se preduzimaju mjere spašavanja radnika, ukoliko su njihovi životi u opasnosti, a zatim spašavanje materijalnih dobara.

#### **Član 52.**

U početku, akcijom gašenja požara rukovodi Direktor Visoke škole, lice koje ga zamjenjuje ili odgovorno lice za zaštitu od požara na Visokoj školi, odnosno lice koje je prvo započelo gašenje požara, a po dolasku profesionalne vatrogasne jedinice rukovođenje akcijom gašenja požara preuzima ovlašteno lice vatrogasne jedinice.

#### **Član 53.**

Lice koje rukovodi akcijom gašenja požara ovlašteno je da:

- svim licima koja ne učestvuju u akciji gašenja požara zabrani pristup na mjesto požara,
- naredni prekid i isključenje dovoda električne energije, te drugih energenata i zapaljivih materijala,
- organizuje spašavanje lica i materijalnih dobara,
- angažuje sve radnike na akciji gašenja požara, bez obzira na radno vrijeme.

#### **Član 54.**

Neodazivanje radnika na poziv za gašenje požara predstavlja težu povredu obaveza iz radnog odnosa i onda kada isti nisu zbog takvog postupka radnika nastale štetne posljedice po Visoku školu.

### **XI – OBAVEZE VISOKE ŠKOLE PREMA ORGANIMA NADZORA**

#### **Član 55.**

Nadzor nad sprovođenjem mjera iz oblasti zaštite od požara vrši inspekcija zaštite od požara pri Ministarstvu unutrašnjih (unutarnjih) poslova Federacije Bosne i Hercegovine.

#### **Član 56.**

Visoka škola je dužna omogućiti inspektoru iz oblasti zaštite od požara ulaz u objekat i pružiti mu svu potrebnu pomoć prilikom vršenja nadzora.

### **Član 57.**

Visoka škola je dužna na zahtjev inspektora iz oblasti zaštite od požara dostavi na uvid svu potrebnu tehničku dokumentaciju i dokumentaciju iz oblasti zaštite od požara.

### **Član 58.**

Visoka škola je dužna postupiti po rješenju inspektora iz oblasti zaštite od požara u rokovima koje odredi isti.

## **XII – PRELAZNE I ZAVRŠNE ODREDBE**

### **Član 59.**

Eventualne izmjene i dopune ovog Pravilnika može vršiti samo Upravni odbor Visoke škole na prijedlog Direktora, po postupku i na način kako je donešen ovaj Pravilnik.

### **Član 60.**

Na sve ostalo, što nije izričito definisano ovim Pravilnikom, primjenjuju se odredbe pozitivno-pravnih propisa iz oblasti zaštite od požara i općih akata Visoke škole koji regulišu ovu oblast.

### **Član 61.**

Autentično tumačenje ovog Pravilnika daje Direktor Visoke škole.

Datum: 29.10.2016. godine

Broj: 38-2-10/16



PREDSJEDNIK UPRAVNOG ODBORA  
FINra  
Dr.sc. Adil Kurtić, prof. emeritus